



HĀ ORA

E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: He Hononga ki Ngā Atua
Tau 2–5 (Taumata 1–2)

Hā Ora: Harakeke Pūnga Whānau
Tau 2–4 (Taumata 1–2)

Hā Ora: Te Ahi Kātoro
Tau 2–5 (Taumata 1–2)

E toru ngā kōwae ako i roto i te rauemi o Hā Ora. Ko te Hā Ora hoki te kaupapa e tūhonohono ana i ngā kōwae ako katoa. Toroa te whānuitanga o ngā ngohe kei te rauemi nei, ā, whakahāngaihia ngā mahi ki ngā whāinga a tō akomanga.

Te whakarārangitanga mai o ngā kōwae ako e toru:

Te Kōwae Tuatahi: He Hononga ki Ngā Atua

Nā Rawiri Hindle rāua ko Bert van Dijk

Kei te whakaahua atu tēnei kōwae ako i te whanaungatanga i waenganui i te marautanga o Ngā Toi me te Hauora, e āhei ai tātou ki te whakamāmā i ngā taumahatanga, ki te whakatau i ō tātou whakaaro, ki te rongo, ki te whakaputa hoki i te hōhonutanga o ō tātou ngākau, ki te whakapūmau anō i tō tātou hononga ki te taiao. Kei konei ētahi ngohe puoro me ngā ngohe ā-tinana hei whakatau i ngā whakaaro me te mauri o te tamaiti, hei whakakaha hoki i tōna wairua mā ngā akoranga e tūhono ana i te tangata ki a ia anō, ki tētahi atu, waihoki ki te taiao.

Te Kōwae Tuarua: Harakeke Pūnga Whānau Nā Priya Gain

Kei tēnei kōwae ako ngā ngohe puoro, ngā ngohe ā-tinana hoki e whakaahua ana i ngā kupu whakarite me ngā kitenga ā-kanohi e pā ana ki te harakeke. He mahi auaha, he mahi ngahau hoki ēnei. He waiata tētahi o ngā ngohe, he mea titi mō tēnei kaupapa, arā, hei āwhina i ngā tamariki ki te tūhura i te kaupapa o te whānau mā roto i ngā kōrero a te ao Māori mō te harakeke. He mea waihanga ngā rawa me ngā tūkanga i raro i te tikanga whakaako puoro a Orff, arā, kua tuituia te waiata, te korikori, te reo, te puoro me te mahi titi ohia.

Ko te hā o te ora tēnei. Ko te tūmanako, ka tautoko tēnei kaupapa i te hauora o te tamaiti i tōna hokinga atu ki te poho o tōna kura i muri i te pānga atu o tētahi taumahatanga. E whakaahua ana hoki te kaupapa o Hā Ora i te mauri oho me te wairua hihihi, koia hoki te pūtake o ēnei mahi.

Te Kōwae Tuatoru: Te Ahi Kātoro Nā Makaira Waugh

Kei tēnei kōwae ako tētahi ngeri mō te mate urutā me te wā o te noho kāinga ki Aotearoa. Ko te ngeri nei te whakaawenga mō te tuhi paki, mō te mahi kanikani me te mahi puoro. Kei konei hoki ētahi ngohe kanikani e pā ana ana ki ngā wheako o ngā ākonga i te wā o te noho kāinga. Ka tūhuratia te wāhi o roto, o waho hoki i ō rātou poiham me ngā whakataukī e whai pānga ana ki tēnei kaupapa. Kua tīkina ake ētahi o ngā āhuatanga nō roto i te ngeri hei whakatau i ngā whakaaro o ngā ākonga, e tūhono atu ai rātou ki ngā tini āhuatanga o te taiao mā te mahi whakaaturanga.

Ko te poutokomanawa te pou i waenganui i te wharenu. Ko te manawa tērā o te whare, e hāpai ana i te katoa o te whare, e tūhono ana hoki i te whenua ki te rangi. He toi tawhito nō ngā tīpuna, e mau ana i ngā kōrero tuku iho. Ko te ingoa tēnei o tō mātou kāhui, koia hoki te whāinga nui o ā mātou mahi, arā, kia whai wāhi mai ngā mahi auaha, kia tipu, kia ako te tamaiti, kia poipoia hoki tōna ngākau.

Ko te POUTOKOMANAWA o Te Rito Toi

He mahinga ngātahi a Poutokomanawa e hāpai ana i te reo, i te mana whakahaere me te mana whakatau a te Māori i roto i te whanaketanga mai o te marautanga toi i roto i ngā kura o Aotearoa. Ko tā te kaupapa nei, he whakamana, he tautoko i te hunga e mahi ana i ngā akomanga rumaki, he whakamana hoki i te tohungatanga me te mātauranga e puta atu ana i ēnei momo wāhi ake. Ka taunaki tō mātou kāhui i ngā akoranga e whakapūmau ana; i te auahatanga, i te mātauranga toi, i te hauora, i ngā tūhuratanga me ngā tākarō e arahina ana e te tamaiti, i te taiao me te mātauranga ā-rohe.



E āwhina ana i ngā kaiako kia mahitahi
ki ngā tamariki i tō rātou hokinga atu ki
te kura i muri atu i tētahi aitua nui, i te
pānga atu o tētahi taumahatanga nui
rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

E tūhono atu ana ki ngā Atua

Nā Rawiri Hindle rāua ko Bert van Dijk

Kupu whakataki

Ko te wā o te taumahatanga tēnei, o ngā hurihangā me ngā pāhekeheke nui. Nā te pānga kaha mai o ngā hurihangā nei me ngā āhuatanga matawhawhati, he nui tonu ngā māharahara o ngā kaiako, waihoki o ā tātou ākonga e pā ana ki ngā mahi noa o ia rā. Ki te whakapūmau tātou i te hononga i waenganui i Ngā Toi me te Hauora, ka puta mai ētahi ara e heke ai ō tātou māharahara. Ka tau te hinengaro, ka rangona, ka whakaputaina hoki te hōhonutanga o te ngākau tangata. Ka rongo anō hoki tātou ki te mana o te taiao.

He mea nui te whakawhanaketanga mai o te Āiotanga i roto i ēnei rauemi. E kīa ana, 'Ko te hiranga tērā o ngā tairongo o te wātū (van Dijk, 2016). Mā te Āiotanga ka rongo mai tātou ki a tātou anō, ki ētahi atu, waihoki ki te taiao. Me tūhono atu tātou ki ngā āhuatanga taketake o te taiao, e āhei ai tātou ki te tūhono atu ki ngā atua. Ko te whakapapa tonu tēnei o tātou te tangata.

Mā ngā ngohe i roto i ēnei rauemi ka rongo tātou ki ngā momo mauri o ngā atua, mā konā, ka tau ō tātou hinengaro, ō tātou tinana, ā, ka whai kaha hoki ō tātou wairua.





E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

Hā ki roto Hā ki waho

Ka taunga ana ngā tamariki
ki ngā nekehanga, ākina
rātou kia waihanga i ō rātou
ake nekehanga mō ia atua.

TIKANGA MAHI 1

Mihi ki ngā Atua

Mā te hā o te tangata hei whakapuaki i ngā mahi o te rā, hei whakamihi hoki i ngā atua. Ka whakaputaina te hā, me whakatauira ngā āhuatanga, ngā nekehanga rānei o ia atua [tirohia te ataata]:

- | | |
|----------------|-------------------------------------|
| 1. Hā ki roto | Hā ki waho x 3 |
| 2. Hā ki roto | Hā ki waho: Mihi ki a Ranginui |
| 3. Hā ki roto | Hā ki waho: Mihi ki a Papa tūā nuku |
| 4. Hā ki roto | Hā ki waho: Mihi ki a Tangaroa |
| 5. Hā ki roto | Hā ki waho: Mihi ki a Tānemahuta |
| 6. Hā ki roto | Hā ki waho: Mihi ki a Tāwhirimatea |
| 7. Hā ki roto | Hā ki waho: Mihi ki a Rūaumoko |
| 8. Hā ki roto | Hā ki waho: Mihi ki a Tū-matauenga |
| 9. Hā ki roto | Hā ki waho: Mihi ki runga |
| 10. Hā ki roto | Hā ki waho: Mihi ki raro |
| 11. Hā ki roto | Hā ki waho: Mihi ki waho |
| 12. Hā ki roto | Hā ki waho: Mihi ki roto |
| 13. Hā ki roto | Hā ki waho: Mihi ki ngā tupuna |
| 14. Hā ki roto | Hā ki waho: Mihi ki a tātou katoa |

Ākina ngā tamariki kia whakakorikori noa i ō rātou tinana i a rātou e whakatauira ana i ngā atua.

Ka taunga ana ngā tamariki ki tēnei tikanga mahi, tonoa rātou kia kapi i ō rātou whatu, kia kore ai rātou e whakamā, e whakawāngia rānei mō te tika, mō te hē rānei o ō rātou nekehanga. Mā konā hoki, ka rongo rātou ki te hōhonutanga o ngā āhuatanga o ngā atua.

Ākina ngā tamariki kia whakamahi i ō rātou reo hei whakaahua i ngā āhuatanga o te atua. Ko ō rātou nekehanga tō rātou ake whakatinanatanga o te atua (ehara i te whakaari noa). Ko te kaiako te tino tauira o ēnei nekehanga. Kei te ataata ētahi whakamārama mō ngā nekehanga, te whakamahinga o te reo me te hā.

Ākina ngā tamariki kia whakahā mā te puku e tau ai te mauri me te wairua, arā, kia kore e pā kaha rawa te ihiihi, te aumoe rānei.

Mēnā ka kaha whāia tēnei tikanga mahi, ka waia haere ngā tamariki, ā ka tau mai te āiotanga ki runga i a rātou.

Video clip 1: <https://www.youtube.com/watch?v=CqQOr5zDie0>

Video clip 2: <https://www.youtube.com/watch?v=RUQ46weNFYE>



E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

TIKANGA MAHI 2

Te Hīkoi o ngā Manu

Whakatakotohia tētahi ara hīkoi (kia 1–2 meneti te roa) ki tētahi wāhi māori, arā: he pāka, te onepū, kei te taha o te awa, o te kōawa, o te roto rānei, ki hea anō hoki rānei.

Me wete ngā tamariki i ō rātou hū. Arahina rātou kia hīkoi i tēnei ara. Whāia te rere o te matawā, ā hoki atu anō. Kia nui tonu ngā takahanga o te ara. Ka tino kitea ngā hua o tēnei ngohe, arā, ka rangona te Āiotanga (arā, ko te hihiri o ngā tairongo o te wātū) mēnā ka hīkoi rātou ki runga i ngā momo papa rerekē, arā, ko te pātītī, ko te rākau, ko te raima, ko te kirikiri rānei.

I a rātou e hīkoi ana, he mea nui kia wātea ō rātou tairongo katoa ki te taiao nā reira; wetekina ngā kawe rongo, ngā karapū, ngā pōtae e kapi ana i ngā taringa, te aha atu, te aha atu.

Me hīkoi noa (kia kaua e tere rawa, e pōturi rawa rānei), ā, i a koe e hīkoi ana me aro atu ki ngā tairongo katoa (ngā kitenga, ngā rongotanga ā-taringa, ā-ihu, ā-ringa, ā-waha, ā-ngākau) e puta ake ana huri noa i a rātou (ki mua, ki muri, ki runga, ki raro, ki te taha matau, ki te taha mauī, ki waho atu o te tinana, ki roto anō i te tinana).

I muri atu, whakaahuatia ngā maharatanga mō tēnei mahi mā te tuhi rotarota poto, mā te tā pikitia piakano hinu, mā te whakamārama atu rānei i ētahi o ngā āhuatanga i rangona e koe.



E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

Ko tā tēnei ngohe,
he whakawhanake
mai i te āiotanga o
ngā tamariki ki ngā
aronga katoa, ā, ka
whakaohohongia
ngā momo
āhuatanga rerekē i
a rātou e tūhura ana
i ngā aronga e ono.

TIKANGA MAHI 3

Ngā Aronga e Ono

Arahina ngā tamariki kia whai i tētahi raupapatanga o ngā nekehanga, kia tūhono atu rātou ki tō rātou taiao mā ngā aronga e ono.

Aronga 1: Ki te taha matau

Aronga 2: Ki te taha mauī

Aronga 3: Ki mua

Aronga 4: Ki muri

Aronga 5: Ki runga

Aronga 6: Ki raro

Tuatahi, me aro atu ngā tamariki katoa ki te kaiako. Ka karanga te kaiako: "**ki te taha matau**". Ka neke whakatematau ngā tamariki (me ū tonu te waewae mauī ki te papa). Ka huaina te aronga e ngā ākonga i a rātou e neke haere ana.

Ka tae atu rātou ki te roanga o tō rātou toronga atu ki te taha matau, ka pohewa rātou e toro haere tonu ana rātou ki tua atu o te akomanga, o te wāhi korikori rānei, ki tua atu hoki o ngā kāinga, ki tua atu o tō rātou tāone, o tō rātou whenua, ki tua rā anō. Kātahi ka tae ki te wā me hoki mai anō rātou. Kua tapaina te tūranga i mua i te tīmatanga o te mahi me te tūranga i mua i te tīmatanga o tētahi aronga hou ki te ingoa o "te kore". Arā, kāore koe i te hoki mai i tētahi wāhi, kāore hoki koe i te haere ki tētahi wāhi. Kei te tū noa koe i te "wātū".

Nā wai rā, ka karanga te kaiako i tētahi atu aronga: "**ki te taha mauī**". Ka whai ngā ākonga i tēnei aronga, i a rātou e haere ana, ka whakahua hoki rātou i te aronga. Ka tae rātou ki te mutunga o ā rātou toronga ā-tinana, ka pohewa anō e haere tonu ana rātou. Ā ka whāia ngā aronga e ono, ka hoki mai anō rātou ki 'te kore' i waenganui i ia tohutohu.

He tauira anō:

Ngā koronga

Te huaki, te kapi, te pana, te tō, te awhi, te maka, te aha atu, te aha atu.

Ngā kare ā-roto

Te koa, te ngākau pāpaku, te riri, te pōuri, te whakamā, te aha atu, te aha atu.

Te pohewa noa

Ānō nei e mānu ana, e waihanga ana, e rere ana, e whiti ana, he putiputi e puare mai ana ki a Tamanuiterā.

Video clip 3: <https://www.youtube.com/watch?v=bf0wJqndWvY>



E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

Tāwhirimātea

Ngā nekehanga auaha mō ngā momo whakatinanatanga
o Tāwhirimātea

Ngohe 1: Ohia manomano

Ohia manomanotia ngā āhuatanga me ngā momo whakatinanatanga o te hau.

Hei tauira: te hau angangi; te āwhā, te huripari, te haruru o te hau, te hau pōrangī; kia purea e te hau, te tūpuhi; te kōhauhau; te hau riri; te tangitangi o te hau; te hau marino.

Ngohe 2: Ngā whakaahua me ngā oro

Rapua ētahi whakaahua mō ngā momo hau (he whakaahua, he peita; he whakaahua toka nō te ataata).

Waihangatia kia 2, kia 3 rānei ngā pikitia o ngā momo hau mā te piakano hinu.

Rapua ngā hopunga oro o ngā momo hau me te marangai.

He mahi ā-rōpū iti: waihangatia tētahi whakaaturanga oro mā ngā reo me ētahi taputapu. Whakatakotoria te tīmatanga, o waenganui me te mutunga.

Ngohe 3: Te Kanikani a te Hau

Whakarongo ki ngā momo hau, whakakorikorihiā te tinana.

Titiro ki ngā pikitia o ngā momo hau, whakakorikorihiā te tinana.

Whakarongo ki ngā whakaaturanga oro nō te Ngohe #2. Whakakorikorihiā te tinana hei urupare ki ēnā mahi.

Ngohe 4: Ngā Aronga e Ono

Whāia ngā aronga e ono i a koe e whakatinana ana i ngā momo hau:

- Kia rite ki te hau angangi
- Kia rite ki te huripari pōrangī
- Kia rite ki te haruru o te hau
- Ānō nei, kei te puhipa tētahi huruhuru
- Ānō nei, kua panaia koe e te tūpuhi

Video clip 4: <https://www.youtube.com/watch?v=4RHkgvqCO4M&feature=youtu.be>



Ngā hononga ki a *Papatūānuku* ki a *Tānemāhuta* (He Kanikani Harakeke)

E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)



Mā te pāorooro o te reo ā-waha, ka ākona ngā kupu a te waiata '**Hūtia te Rito o te Harakeke**', arā, ka huaina ia rārangi e te kaiako, ka whakahuatia anō aua kupu e ngā tamariki. Kātahi ka waiatatia ia rārangi, ka tāruaruatia ia rārangi mā te reo pāorooro.

Hutia te rito
Hutia te rito o te harakeke
Kei hea te kōmako e kō?
Kī mai koe ki ahau

He aha te mea nui?
He aha te mea nui i te Ao?
Māku e kī atu
He tāngata, he tāngata, he tāngata!

Matapakina te hōhonutanga o te waiata ki ngā tamariki. Whakahāngaihia ngā whakamārama o ngā kupu ki ō rātou ake tirohanga. Whakamāramahia atu te tū o te rito hei tamaiti, ki waenga pū i te whānau, e karapotia ana e ngā mātua me ngā kaumātua. Whakaatuuhia tēnā wāhanga o te harakeke.

Video clip 5: <https://www.youtube.com/watch?v=UBiysjZvPGI>



E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

He whakaaro anō mō ngā nekehanga/kanikani mō te Harakeke

Mā te hunga matatau:

Mā te tārai ā-tinana me te neke kārewa, waihangatia ētahi nekehanga mā te waiata Hutia te Rito o te Harakeke.

Ka waiatahia te waiata e te rōpū, nā reira, mā rātou te taioro me te tere o te waiata e whakatakoto. Mā rātou anō ngā nekehanga e whakahāngai ki te taioro me te tere o te waiata. Me rapu hoki te rōpū i tētahi wā e tū toka ai, e wahangū ai hoki rātou i a rātou e waiata ana, e kanikani ana hoki. Kia kotahi, nui ake rānei ngā wā tū toka. Tirohia te ataata 6.

Tirohia ngā nekehanga o te harakeke e pūhia ana e te hau.

Pohewatia ngā nekehanga i te hau angangi, ā tae atu ki te hau āwhā. He aha rā te āhua o te harakeke mākū e tū noa ana?

Arahina ngā tamariki kia whai i ngā nekehanga rerekē, arā, ko te tārai ā-tinana – ānō nei e hīkoi haere ana ki rō pōharuharu. He pōturi tēnei momo nekehanga, he mahi whai tikanga hoki. Ka āta nekehia te tinana, ka tino rangona ngā wāhanga katoa o te tinana. Ānō nei e pāparehia ana ia nekehanga.

Ināianei, whakatauritehia te tārai ā-tinana ki te neke kārewa (anō nei he rau e pūhia ana e te hau). He nekehanga māhorahora kē tēnei, he tere ake, ā, he wairua hihiri anō tō tēnei momo nekehanga.

He kōwhiringa

Rapua ētahi puoro hei kīnaki mō ngā nekehanga. Me kimi rānei te puoro i te tuatahi, kātahi ka waihangatia ngā nekehanga e hāngai ana ki te puoro. Me rapu kē rānei tētahi hopukanga o te taonga puoro, me whakatangitangi te taonga puoro, ētahi atu rawa puoro noa rānei, pērā i ngā kōhatu, i ngā rākau, i ngā poi rānei.

Ka whakaae katoa tō rōpū ki tā koutou mahi – kia kaha ki te whakaharatau, e whakapūmautia ai ngā nekehanga ki roto tonu i a koutou katoa.

Video clip 6: <https://www.youtube.com/watch?v=FJAdS8gNb7Y&feature=youtu.be>



E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)

Harakeke Pūnga Whānau

Nā Priya Gain




Mahi toi nā Charlotte Prebble.

He maha ngā ngohe kei tēnei kōwae ako e whai wāhi ai ngā tamariki ki te whakaputa i ō rātou whakaaro e pā ana ki ngā kupu whakarite me ngā kitenga mō te harakeke mā te puoro me te mahi nekenekē i runga i te ngākau auaha me te wairua ngahau. He mea waihangā ngā rawa me ngā tūkanga i runga i te tikanga whakaako a Orff, arā, kei te tuituia te mahi waiata, te mahi nekenekē, te reo, te whakatangitangi puoro me te tito ohia. Kei www.ketearonuiorff.com te roanga o ngā whakamārama mō te mātauranga Orff me te hoahoatanga o ngā marautanga mā ngā kura tuatahi o Aotearoa.

Kua whakarārangihia mai ngā ngohe ki ngā kōwae ako e toru hei whiriwhiri noa mā te kaiako. Hei konā, ka kitea te hora o ngā mahi kei raro i tēnei kaupapa – ka rua wiki pea, neke atu rānei te roa. Heoi, nā te āhua o te whakatakoto, he māmā noa iho hoki te tiki ake i te ngohe kotahi anake hei akoranga tōtahi kē.

I te mea he ringatoi hoki te kaiako, kei te ākina rātou kia whakahāngai i ngā rauemi ki ā rātou tikanga whakaako, ki ā rātou tamariki hoki. Tērā pea, ka pai ngā tamariki ki ētahi ngohe, kāore pea rātou e pai ki ētahi atu. Ka taka te wā, ka āta pakari haere tō rātou tū me ā rātou whakaaturanga auaha. Tērā pea, ka whakaawea te kaiako e ngā akoranga nei, ā, ka whakawhanake mai i tētahi whakaaturanga nui ake hei whakatū ki tētahi huinga ūpaki, ki tētahi huinga ūkawa rānei. Ko te whāinga matua, kia ngāwari tēnei rauemi, kia māmā ngā mahi mā ngā tamariki, kia kitea hoki ngā ara maha e puta mai ai ngā mahinga auaha e kōkirihia ana e te tamaiti. Ko te tūmanako, kia rite tonu te hokinga atu o ngā tamariki ki ngā ngohe nei, pērā i te waiata, i runga i te ngākau harikoa. Kia hua mai hoki ā rātou ake tini mahinga auaha me ngā titonga ohia.



Toi tā nā Makaira Waugh.



E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)

WĀHANGA A

Ko ngā kitenga o ngā tamariki, ko ngā kupu whakarite me ngā mahinga toi hei tīmatanga



Ngā tānga ā-karu

Mēnā kei te tipu mai he harakeke ki tō kura, mauria ngā tamariki kia kite i te tipu nei. Ki te kore, whakaatuhiā tētahi whakaahua, tētahi pikitia rānei ki a rātou.

Me āta titiro te katoa o te akomanga ki te rākau.

- Matapakina te āhua o ngā rau. Ohia manomanotia ngā kupu e whakaahua ana i ngā rau.
- Whakaatuhiā ngā wāhanga o te tipu, kei te whakamarumarutia ngā wāhanga o roto e ngā wāhanga o waho.
- Whakamāramahia atu ki ngā tamariki, he pakeke ake ngā rau o waho, arā, ko ngā mātua me ngā kaumātua ērā e whakamarumaru ana i ngā rau pakupaku, ānō nei he tamaiti tērā kei te pūtake o te tipu.

Koia hoki te take he tohu te harakeke mō te whānau i te ao Māori.

- Whakarārangihia ngā kupu āhua e hāngai ana ki ngā rau. Āta mātaihia ngā āhuatanga moroiti o te rau, arā, ko te pito o ngā rau, ko te piko, ko te takoto o tētahi ki runga ake i tētahi, hei tauira, kua koki, kua kōpiko, he tōtika, he koi, kua takaia
- Āta tirohia ngā te hanganga o ngā wāhanga o te harakeke, e kīia ana e ngā kairaranga ko te 'kōwhiuwhiu'. Me he akaaka o te kōwhiuwhiu, ki te whakatōkia te mea kotahi noa, ka tipu ake he kōwhiuwhiu hou. Ka tipu haere te pūnga, ka hōrapa, ka tū mai he rākau nui anō.
- Whāngaihia ngā tamariki ki ētahi kupu Māori mō ngā wāhanga rerekē o te harakeke.

E pūmau tonu ai te ora o te rākau, e kore ngā kairaranga e huhuti i te rito, i ngā mātua (awhi rito) rānei. Ka noho ngā mātua ki te tiaki i te tamaiti/rito.




E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)



Ngā rau tūpuna o te harakeke.



Mahi toi nā Amelia Prebble.



Mahi toi nā Charlotte Prebble.

Tonoa ngā tamariki kia tā ā-karu i te tipu, me āta titiro rātou ki ngā āhuatanga moroiti o te rākau. Ānō nei he tānga tēnei nō te mātanga pūtaiao, arā, kei te āta mātaihia ngā taipitopito katoa.

- Āta whakaatuhiā ngā wāhanga o te tipu pērā i te pūnga, i ngā putaputa, i ngā kōiraira rānei ki runga i ngā rau, waihoki ko ngā pito taretare.
- He tukutuku pūngāwerewere e huna ana ki roto i te tipu?
- Kei te kite rānei koe i ētahi atu pepeke, he koiora anō rānei e noho ana i tēnei rākau?
- Ki te āta mātakitaki koe, ka tau mai ētahi manu ki te rākau?
- He aha hoki rānei ngā manu ka tau mai ki runga i te rākau nei ki ō whakaaro?

Ki te whakakotahihia te kōrero mō te whakapapa, mō te whānau me ā rātou tānga pūtaiao, ka whai kiko ā rātou tānga, ka rongo hoki rātou ki te hōhonutanga o te kaupapa. Kātahi, ka āhei rātou ki te whakamārama atu i te noho o te whānau ki roto i te pūnga harakeke.

Te Tango Whakaahua

Me he kāmera ā ngā tamariki, ka āhei hoki rātou ki te whakaahua i te rākau, ki te tini i te pānga atu o te aho, i te taitapa hoki o te pikitia. Mā konā, ka aro atu rātou ki ngā wāhanga rerekē me ngā taipitopito o te rākau. Mēnā ka taea e rātou te tiki ake i tētahi momo taupānga whakaraweke whakaahua, ka taea te rāwekeweke i ngā whakaahua o te harakeke. Ko te aronga nui o tēnei momo ngohe ko te taha toi, arā, ko ngā momo mahi whakapaipai whakaahua pērā i te haukoti āhua, i te tātari aho, i te kauruki whakaahua me te rāwekeweke i ngā kano.



Whakaahua nā tētehi tamaiti, e 8 ūna tau.



E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)

WĀHANGA B

He Waiata, he Nekehanga, he Tākaro Puoro hoki mā ngā Tamariki



Wāhanga A: Te Waiata mō te Whānau o te Pūnga Harakeke

Te Whakataki i te Waiata Tāruarua

Whakatakinā te Wāhanga A o te waiata, arā, waiatahia tētahi rerenga o te waiata, ā, me tāruarua ngā tamariki i taua rererenga. Me waiata noa, me whakatangitangi hoki rānei i te ukulele, i te rakuraku rānei. E rua anake ngā rauoro, arā, ko te C me te G⁷.

Ka waia haere ngā tamariki ki te rangi, tonoa rātou kia whai i te taki. Me papatu rātou i ō rātou turi (ia 2 taki) – ko te “Tuku Taki” tēnei ki runga i te titonga tōpū.

E Tūhura ana i te Mahi Takitaki

Ka waia haere ngā tamariki ki te “tuku taki” ki runga i ō rātou turi, tukuna rātou kia mahi i ētahi atu tūmahi hei whai i te taki, arā, ko te pakipaki, ko te papatu i te papa, i ngā matiwae, i ngā pokohiwi rānei, i te pakē matimati … tukuna ngā hinengaro auaha o ngā tamariki kia rere.

Kia nui ngā waiatatanga o te waiata (ko te wāhanga A anake). Whakamātauria ngā momo whakaputanga rerekē, arā, kia māmā te reo, kia pōturi, kia tere, kia ihiihi, kia kaha, kia aha atu anō rānei. Māu tonu ngā āhuatanga e whakatauira atu i te timatanga o ia putanga o te waiata. Ka whai haere ngā tamariki i a koe – me whakamātau ngā āhuatanga maha hoki. Kia nui ngā waiatatanga o te waiata, ka taunga haere ngā tamariki ki te waiata.

Tonoa ngā tamariki kia kimi i ētahi mahi ā-ringa e hāngai ana ki te harakeke hei whakaahua hoki i te noho o te whānau.

Harakeke

pūnga whānau

i te aroha

pūtake kaha e

He waiata ā-ringa mā te akomanga

Whakamātauria ētahi mahi ā-ringa ki te kimi i tētahi whakaraupapatanga ā-ringa mā te katoa hei mahi mai i tō koutou ake waiata.



E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pāngā atu o tētahi taumahatanga nui rānei ki tō rātou ao

Hā Ora: Te Ahi Kātoro *Tau 2–4 (Taumata 1–2)*

WĀHANGA B

He Waiata, he Nekehanga, he Tākaro Puoro hoki mā ngā Tamariki

Harakeke Pūnga Whānau

Priya Gain

4 *Whakahoki a te rōpū* *Karanga a te kaea* *Whakahoki a te rōpū* *Katoa (mai i te whetū)*


pū - nga whā - nau i te a - ro - ha i te a - ro - ha pū - ta - ke
 X X X X X X

7 C WĀHANGA B
Hei ngohe kanikani

Pākia ngā X



E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)

WĀHANGA B

He Waiata, he Nekehanga, he Tākaro Puoro hoki mā ngā Tamariki



Wāhanga A: Te Waiata mō te Whānau o te Pūnga Harakeke

He Waiata Tuku, He Tākaro Tuku rānei:

Te Tuku Kōhatu

Me noho ngā tamariki ki te porowhita. Me rite ō rātou ringaringa ki te tuku atu i tētahi mea (tirohia te whakaahua). Ka waiata ngā tamariki i te waiata ka tukuna te kōhatu (hei tauira he kōhatu nō te awa, me waihanga rānei ngā tamariki i tētahi kete kōhatu karakara mō tēnei ngohe) ki te taha matau e whai ana i te rere o te taki. Ka huri haere te kōhatu i te porowhita. He āwhina nui mēnā kei te kaiako tētahi papā, tētahi atu mea rānei hei whai i te taki kia mōhio ngā tamariki ki te wā tika kia tuku i te kōhatu, arā, "me tuku te kōhatu i te paonga o te papā". Ka roa pea ētahi akomanga e whakaharatau ana i tēnei mahi kia tika te rere o te kōhatu i te taki o te waiata.



He kēmu: Te Tū hei Kaiwhakatangitangi Puoro

Ka eke te nui o ngā pakipaki ki te toru (i te mutunga o te Wāhanga A), rapua te tamaiti e mau ana i te kōhatu ki tōna ringa mauī. Kātahi ka whakawhititi atu taua tamaiti i te kōhatu ki tōna ringa matau, ā, ka paoa e ia te papa kei mua tonu i a ia mā te kōhatu, kia toru ngā wā. Kātahi ka hoatu ia i te kōhatu ki te tamaiti kei tōna taha matau, ka haere ia ki te noho ki waenganui i te porowhita. Ka tangohia e ia tētahi o ngā taonga whakatangitangi mai i tētahi putunga iti o ngā taonga whakatangitangi māori noa, arā, he rarā, he tiare, he papā ā-ringa, he kōhatu anō pea nō te awa, he kōrari rānei. Ināianei, he kaiwhakatangitangi tēnei tamaiti i te roanga o te kēmu. Ka whai ngā tamariki i te taki, ka whakatangitangi i ā rātou taonga puoro i te wā e waiata ana, e tuku atu ana ngā tamariki i te kōhatu. Me whakatangitangi hoki ā rātou taonga puoro i te wā o ngā paonga e toru hei whakaū i te whakakapinga o ia putanga o te waiata.



Me waiata tonu, me tuku haere te kōhatu kia nui ngā kaiwhakatangitangi, arā, kia eke te tokomaha o ngā kaiwhakatangitangi e noho ana i waenganui i te porowhita ki te 8–10.



E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)

Ka mōhio ana ngā tamariki
ki te whai i te āwhata oro,
he ngohe pai tēnei mō waho,
i raro i ngā hīhī o Tamanui.

WĀHANGA B

He Waiata, he Nekehanga, he Tākaro Puoro hoki mā ngā Tamariki



Wāhanga B: Te Waiata mō te Whānau o te Pūnga Harakeke

He whakataki i te Āwhata o te Waiata

Whakamāramahia atu te pikinga ake o te āwhata oro o te waiata. Whakatauirahia mā tō reo, mā tētahi taonga whakatangitangi rānei, arā, mā te pakakau, mā te rehu rānei.

- Mā ngā tohu ā-ringa (mā te āwhata hauoro rānei), whakaatuuhia ia whakapikinga ake o te oro.
- Me whai ngā tamariki i ō tohu ā-ringa, arā, "Ka piki ake te oro i te taumata kotahi, me piki ake hoki tō ringaringa i te taumata kotahi."
- Tonoa ngā tamariki kia āta whakarongo mō te taenga atu ki te oro teitei rawa o te āwhata. Tonoa rātou kia pakipaki i te putanga mai o te oro teitei rawa. Ka tatau ētahi tamariki i te nui o ngā oro (ko te waruoro te kupu mō te oro tuawaru), ka matapae ā-taringa kē ētahi.

Ka mau i ngā tamariki te mahi nā, me tūruru ngā tamariki, ā, ka rongo rātou i tētahi oro, ka tīmata ki te tipu haere. Ko te whāinga, ka tae atu koe ki te oro teitei rawa, kua tū tōtika ngā tamariki. Me pakipaki, me peke ake rānei i te taenga atu ki te oro teitei rawa.



E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)

WĀHANGA B

He Waiata, he Nekehanga, he Tākaro Puoro hoki mā ngā Tamariki



Wāhanga B: Te Waiata mō te Whānau o te Pūnga Harakeke

Ngā Ngohe ā-Tinana: Hei Whai i te Āwhata Oro o te Waiata

Ka whai ngā tamariki i a rātou ake kitenga ā-kanohi (ngā tānga, ngā whakaahua rānei) ki te waihanga i te āhua o ngā rau mā ō rātou ringaringa. Ka whāia hoki ngā kupu i puta mai i te ohia manomano, arā, ko te koki, ko te kōpiko, ko te tāwhiuwihu, ko te tōtika, ko te koi, ko te whētuitui hoki.

Tonoa ngā tamariki kia tipu ake i te tangi o te āwhata oro, ka tae ki te mutunga, me whātoro ō rātou ringaringa pērā i ngā rau harakeke e rua. I te mutunga o te āwhata, tukuna ēnei tohutohu; "Ināianei, me tākai/whakaea kōpiko/whai koki ō rau." Me tuku tohutohu i te taenga atu ki ngā taumata rerekē hoki, arā, "I tēnei wā me kōpiko ō rau mai i raro, kia tōtika rawa rānei te toronga ake ki runga rawa". Ka taunga ana ngā tamariki ki ngā āhua me ngā taumata rerekē, tukuna rātou kia kimi i tō rātou ake āhua hei whakakapi i te ekenga o te āwhata. Ākina ngā tamariki kia āta whakaaroaro mō ngā āhuatanga moroiti o te rau, pērā i ngā pito taretare. Ka mahia mai pea tērā e ngā matimati.

Whakamātauria tonutia ngā huānga kanikani pērā i ngā taumata rerekē me te mokowā. Me whakaatu tētahi haurua o te akomanga i tō rātou tipunga ake ki te āhua o te harakeke. Ka mātakitaki te toenga, ka kite rātou i ngā mahi rā, me matapaki ngā painga, arā, ko ēhea ngā nekehanga whai kounga, he aha hoki te take e pai ana aua nekehanga? Mēnā e āhei ana, tukuna ngā tamariki kia āta whakaaroaro anō, ā, ki te whakaputa anō i ō rātou nekehanga ā-tinana i runga i ngā kōrero a ō rātou hoa. Tangohia pea he whakaahua o ngā hanganga, kia kite ngā tamariki i a rātou anō.

I tētahi akoranga anō, arā,
kia nui ngā tūhuratanga o te
tamaiti i tōna kotahi, me mahi
takitoru ngā tamariki ki te kimi i
ētahi nekehanga hei whakatipu
i te rōpū, hei whakakotahi i ngā
rau harakeke e ono (arā, ko ngā
ringaringa) kia puta mai tētahi
tipu hou.



WĀHANGA B

He Waiata, he Nekehanga, he Tākaro Puoro hoki mā ngā Tamariki

E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)



Me whakatangitangi hoki pea ētahi hopunga puoro (pērā i ērā a Hirini Melbourne) hei tūhura i ngā āhua me ngā nekehanga o ngā manu. Me waihanga pea tētahi whakaaturanga ohia ā-tinana, arā, he momo kanikani.



Wāhanga C: Te Waiata o te Whānau o te Pūnga Harakeke

Te Whakataki i tētahi titonga ohia kōwhiowhio mō ngā karanga o ngā manu me te kanikani ā-ringa o te tūī

Ka tae ngā tamariki ki te tihi o te āwhata, tonoa rātou kia pupuri i ō rātou toronga ā-ringa, me tū noa mō tētahi wā. Me wahangū ngā tamariki, me āta whakarongo hoki. Kātahi, ka āta whakaheke ngā tamariki i ō rātou ringaringa, ā, mēnā e āhei ana rātou me tīmata rātou ki te korowhio kia rite anō ngā reo ki te korowhitī o tētahi huinga manu. Tukuna rātou kia whakaputa i ētahi o ngā tauira whakatangitangi o ngā manu, ā, me whakarongo hoki rātou ki ngā reo e puta atu ana i ngā momo 'rākau' rerekē i roto i te rūma. Me tono hoki rānei ētahi tokorua ki te whakamātau i tētahi whakawhitinga ā-reo. Me whakaatu ētahi tokorua i ā rāua mahi ki te rōpū, kia rongo te katoa i ngā momo whakawhitinga ūhia o te reo puoro.

Tūī – E Noho ana i runga i te Harakeke:

Ka tae ngā tamariki ki te tihi o te āwhata, tonoa rātou kia pupuri i ō rātou toronga ā-ringa, me tū noa mō tētahi wā. Me whakarongo noa ngā tamariki, kātahi ka āta noho rātou, ka whakaheke hoki i ō rātou ringaringa ki mua tonu i ō rātou aroaro hei waihanga i te āhua o te tūī. Hei parirau, hei ngutumanu pea ō rātou ringaringa. Tukuna ngā tamariki kia whakamātau haere i ētahi āhua me ētahi nekehanga ā-ringa mō te tūī e noho ana ki runga i te rākau harakeke.

Ko tāku mahi, he whakanoho i ngā tamariki i te tuatahi hei whakaako i tēnei āhuatanga. Mā konā, e āhei ana ngā tamariki ki te āta aro atu ki te āhua o ā rātou mahinga ā-ringa. Heoi, i te akoranga tuarua, ka whakahau au i ngā tamariki kia tū motuhake ki te āta whakamātau i ngā taumata rerekē, i ngā āhua ā-tinana me ngā nekehanga rerekē. Ki a au, ko te painga atu ki te kore ngā tamariki e neke haere ki wāhi kē, me tū noa ki te wāhi kotahi. Pērā i te tipu, me ū ngā pakiaaka o ngā tamariki ki tō rātou tūranga, heoi, he pai noa te āta whakamātau i ētahi nekehanga ā-tinana i a rātou e tū ana. Mēnā e hiahia ana ngā tamariki kia tū ki te mahi i ngā nekehanga o ā rātou manu, kei te pai noa iho tēnā. Whakaatuhiha atu ki ngā tamariki ngā painga o ngā taumata rerekē mā te tango whakaahuha, me tū rānei tētahi haurua o te akomanga ki te whakamātau i ō rātou nekehanga, ā, me mātakitaki noa te toenga. Me tāpiri atu ngā tamariki tō rātou titonga ohia oro ā-waha hoki i a rātou e tūhura ana, e tākaro ana i ō rātou hanganga ā-tinana.



E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)

WĀHANGA B

He Waiata, he Nekehanga, he Tākaro Puoro hoki mā ngā Tamariki



He Tauira o te Haiku

Rau horahia

Wiri, kapa, tū, rapa

Awhi mai e

Te Whakauru atu i te Reo me ngā Kupu Whakarite

Whakamāramahia atu ētahi whakataukī/kīanga rānei e pā ana ki te harakeke me te noho ā-whānau. Ka taea pea e ngā tamariki te tito i ā rātou ake rotarota, hei tauira, ko tētahi haiku mō te harakeke, me whai rānei tētahi o ngā kīanga/whakataukī kei raro iho nei.

Kia kaha, kia māia, kia manawanui

Waiho i te toipoto, kaua i te toiroa

Aroha mai, aroha atu

Ehara taku toa i te toa takitahi engari he toa takitini

Ahakoa te iti te kākano, he pounamu kātahi ka tipu ake

Me whiriwhiri ia rōpū kanikani tētahi kīanga/rotarota rānei e hāngai ana ki tō rātou hanganga ā-tinana. Tāia ngā kupu, tāpirihia atu tētahi ‘pānui’ ki mua tonu i ō rātou hanganga. Me pānui ā-waha pea tētahi atu tamaiti, te kaiako rānei, i a rātou e tirotiro ana i ngā whakaaturanga toka ā-rōpū – ānō nei e hīkoi haere ana rātou i roto i tētahi wharetoi e pānui ana i ngā kōrero mō ia mahinga toi.



E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)



Me he rawa kanikani
āu, pērā i te kāmeta, i te
rīpene rānei me hoatu
ki a rātou, heoi, he
kōwhiringa noa tēnei.

WĀHANGA B

He Waiata, he Nekehanga, he Tākaro Puoro hoki mā ngā Tamariki

He Kōrero i waenganui i te Harakeke me Tāwhirimātea.

He pēhea te haere o tētahi whakawhitinga kōrero i waenganui i te harakeke
me Tāwhirimātea?

Tūhuratia te reo i te tuatahi

Me whakatakoto te akomanga i tētahi rārangi ā-kupu mō te hau. Tāia tētahi kupu ki ia pito o te rārangi, ā, tonoa ngā tamariki kia kimi i ngā kupu tōtika hei whakauru atu ki waenganui. Ka āta whiriwhiri ngā tamariki i ia kupu hei whakatakoto ki runga i te rārangi ā-kupu. Kei tētahi taha o te rārangi ngā kupu e pā ana ki ngā momo hau, kei tērā atu taha ngā kupu mahi e hāngai ana ki ngā momo hau rerekē, hei whakaahua hoki i te mahi a ngā rau. Ko tētahi momo whakawhitinga kōrero tēnei i waenganui i a Tāwhirimātea me te rākau harakeke a Tānemahuta.

He tauira rārangi ā-kupu mō te hau

kōtengitengi	ngū
kōkōuri	pīwari
pūrekereke	kopekope
hau pūkeri	tītahataha
tūpuhi	pioioi
tūpararā	hūrorirori
	takawheta

Me whakapāho ngā momo puoro rerekē hei whakaahua i ngā kare ā-roto/whakawhitinga rerekē. Ka tūhura ngā tamariki i ngā nekehanga rerekē, mai i te nekehanga mārire ki ngā nekehanga kaha. Me whai wāhi motuhake ngā tamariki kia whakaharatau i ā rātou nekehanga. Me ū ngā waewae ki te papa, me nekeneke ō rātou tinana me ū rātou ringaringa. Me akiaki ngā tamariki kia whakamātauau i ngā hanganga rerekē ki ngā taumata rerekē.



WĀHANGA C

E whakakotahi ana i ngā huānga katoa hei waihanga i tētahi whakaaturanga ūpaki (ōkawa rānei)

E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–4 (Taumata 1–2)

Ka taea te mahitahi ki ngā tamariki kia waihanga i tētahi whakaaturanga mā ngā ngohe e rārangi mai ana ki runga ake nei.



Hei tauira:

I tētahi haurua o te akomanga e waiata ana, me mahi ā-rōpū te toenga ki te whai i te tipunga ake o te āwhata hei waihanga i ā rātou hanganga. Me korowhio hoki ētahi o ngā kaiwaiata, i ngā kaikanikani e mahi ana i ētahi mahinga ā-ringa māmā, iti hoki mō te rau. Ka hīkoi haere tētahi tamaiti, te kaiako rānei, ka pānui i ngā papa kōrero. He whakaaro pea ō ngā tamariki e pā ana ki te kuhunga atu o ngā mahinga ā-ringa mō te tūi. Me whakatangitangi pea ētahi hopunga puoro, i tētahi whakaari oro rānei. Ka hiahia hoki pea ngā tamariki ki te whakauru atu i ā rātou mahinga toi, i ā rātou rotarota rānei ki tō rātou whakaaturanga; me whakatakoto ā rātou mahi ki raro iho i ngā papa kōrero, ki runga rānei i te pakitara o muri.

Kia kaha ki te tuku i ngā tamariki ki te matapiki i ngā huānga rerekē hei whakauru atu ki te whakaaturanga i runga i te āhua o ngā tūmomo mahi kua oti i a rātou i te Wāhanga B. Me whai wāhi ngā tamariki ki te whakamātau i ngā whakaritenga rerekē i mua i te whakataunga o te raupapatanga mahi e pai ana ki a rātou. I a au e mahi ana i te taha o ngā tamariki, kua kite au i te hiranga o tēnei kaupapa ki a rātou. I ētahi wā, ka mahia mai he pānui hei whakatairanga i te whakaaturanga – he nui tonu ngā āheitanga. Koia te wā ki te tuku mā ngā hinengaro o ngā tamariki, waihoki ō rātou whakataunga toi, hei ārahi i te kaupapa.



E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)


Te Ahi Kātoro

Nā Makaira Waugh

Kei tēnei kōwae ako tētahi ngeri e pā ana ki te mate urutā me te wā o te noho kāinga ki Aotearoa. Ka taea te takitaki, te haka rānei i te ngeri. Mā ngā whakataukī i roto i te ngeri hei whakaohooho ngā whakaaro o ngā tamariki mō te paki, te mahi kanikani me ngā mahi puoro. Hei tūāpapa hoki te whakataukī mō ngā momo urupare ā-toi a ngā tamariki me ngā tūmahi e whakaherehia ana e rātou.

E hāngai ana te mahi kanikani ki ngā wheako o ngā ākonga i te wā o te noho kāinga. Ko te mokowā te kaupapa o te mahi, arā, ko te wāhi i toroa e rātou ki roto, ki waho hoki i tō rātou poihamo, waihoki ko ngā whakataukī e hāngai ana ki taua wā. Ka kitea tētahi ara whakaako mō ngā whakataukī ki raro i te tikanga whakaako a Orff, arā, ka whāia ngā oro o te reo hei waihanga i ngā taki mā te tinana me ngā taonga whakatangitangi oro māori noa. Ka taea hoki te whakamātautau i ngā momo rangi mā ngā taonga puoro whai oro tōtika. Kua tīkina ake ētahi āhuatanga o te ngeri mā te waiata ā-ringa, kia tau ngā whakaaro o ngā ākonga, e tūhono atu ai rātou ki ngā wāhanga rerekē o te ao mā te mahi whakaaturanga me te whakawhitihiti kōrero.

Kua tuituia ēnei ngohe, heoi, ka taea te whakaako i te akoranga kotahi noa, i te katoa rānei o te kōwae ako. Kei te ākina ngā kaiako kia whakamātautau i ā rātou ake ngohe, kia whakahāngai hoki i ngā akoranga nei ki ō rātou ake akomanga.





E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

Te Ahi Kātoro

He ngeri nā Makaira Waugh nō Te Ātiawa.

Tērā te wā, ka toro ko te ahi

Wiwī, wawā, katoa te ao

Toipoto ka tanuku, toiroa ka ora

Auē te mokemoke e!

Tūngia ururua kia pāhorehore

He aha te rito e pihi ake?

Ruia taitea kia puea mai

Ko te mana o te whānau e pūtahi nei

Mā te aha e toko ō wawata?

Mā te wai pupuke o te aroha!

Toi tā nā Makaira Waugh.

He ngeri tēnei mō te mate urutā i pā ki te ao whānui i te tau 2020. Kei roto i ngā kupu te tūmanako kia rapu ngā whānau i te hōhonutanga o ō rātou ake moemoeā mō te wā kei te haramai. I ngā wā o te taumaha nui, ka rērere haere ngā whakaaro – e anga whakamua, titiro whakaroto – he wānanga anō kei reira mō tō oranga. Nei kite koe i tētahi mea e ngākaunui ana koe, arā, ki te puta mai he wawata, mā te aroha anō e whakakaha i a koe ki te whai i taua wawata ki tōna tutukinga.

Ko te kaupapa o ētahi o ngā whakataukī kei roto i te ngeri (kei raro iho nei), ko te whakawetewete i ngā mea e here ana i a tātou, kia tipu tonu ai tātou, kia puta mai he māramatanga hou. Ko tōku tūmanako, nā te pānga mai o te noho kāinga ki Aotearoa, ki rāwāhi hoki, kua whai wāhi ngā tāngata ki te āta whakaaroaro mō ngā mea nui ki a rātou, waihoki ki te waihanga mai i te ao e pīrangitia ana e rātou mā ō rātou whānau i tēnei wā, ā ngā rā kei tua hoki. Ka whakapau kaha ana tātou ki ngā kaupapa e kaingākautia ana e tātou, e whakapono nuitia ana rānei, mā ngā tāngata e arohanuitia ana e tātou, ka tino kitea te hiranga o tō tātou tūranga i tēnei ao.

Me waiata noa, me haka rānei i te ngeri nei. Tirohia te hononga ki te ataata ki raro iho nei.

E whai ake ana, ko te waiata o Tirotiro kau. Ko te wānanga, ko te whakaaroaro mō tō tātou ao ātaahua te kaupapa.

<https://www.youtube.com/watch?v=ag3ZTLY12zg&feature=youtu.be>



E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

Whakataukī

Kua whakauruhia atu
ēnei whakataukī ki
roto i te haka. He aha
te whakamārama o ia
whakataukī? He aha te
take i tīkina atu ēnei
whakataukī e te kaitito?

Waiho i te toipoto, kaua i te toiroa.

Tūngia te ururua, kia tupu whakaritorito te tupu o te harakeke.

Ruia taitea, kia tū ko te taikākā anahe.

He tino whakaawenga te whakataukī hei whakataki i te tānga o āu ake rotarota, o āu ake waiata rānei. Me whakamārama atu tō tino whakataukī mā tētahi rerenga kōrero e hāngai ana ki te kaupapa, e whakawhānui ana i te kaupapa, e whakahāngai ana rānei i te whakataukī ki tētahi horopaki motuhake.

e.g. Ruia taitea, kia tū ko te taikākā anahe, hei takere mō tō tātou waka.

Me tāpiri atu ētahi kupu āhua ki tō kaupapa – he pai mēnā e toru ngā whakaputanga o te kupu īhua:

e.g. Waka tere, waka roa, waka māmā.

Tēnā, tāpirihia atu ētahi atu rārangī! Me tākaro noa, kaua e āwangawanga mō ngā ture. Ka tirohia ērā ā muri ake.





E āwhina ana i ngā kaiako kia mahitahi
ki ngā tamariki i tō rātou hokinga atu
ki te kura i muri atu i tētahi aitua nui,
i te pānga atu o tētahi taumahatanga
nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

Tiro tiro kau

He ngohe:

Ākona te waiata Tiro tiro Kau,
mahia hoki ngā mahi ā-ringa.
Me waiata haere ngā rōpū e
rua i te waiata nei. I te rōpū
tuatahi e waiata ana i te
wāhanga tuatahi me waiata
te rōpū tuarua i te wāhanga
tuarua. Matapakina ngā huāngā
o te waiata kia rangona ngā
whakaaro o tō rōpū.

He waiata ā ringa nā Makaira Waugh nō Te Ātiawa

Ki runga, ki raro, ki waho, ki roto

Tiro, tiro e

Ki muri, ki mua, ki wī, ki wā

Tiro, tiro e

Tiro tiro mai

Ki te ao e

Tiro tiro atu

Ki roto i a koe.

Kei te whakaahua tēnei waiata ā-ringa i ngā whakaaro i puta mai i ngā whānau i te wā o te noho kāinga, arā, ki ētahi, he wā pai tērā kia arotake anō i ētahi īhuatanga o tō rātou ao, kia kimi hoki i ētahi ara hou hei whakatutuki i ā rātou mahi. Kei ngā aronga kupu nei te hōhonutanga o te waiata:

Runga, raro – Ko te kauae runga me te kauae raro tēnei, arā, he tohu tēnei mō te taha hinengaro me ngā ariā, tae atu ki te ao kikokiko me ngā mahinga ā-tinana.


Waho, roto – He tohu tēnei mō te ao o waho me te ao o roto i a tātou.

Muri, mua – He tohu tēnei mō ngā rā o nehe me ngā rā e heke tonu mai ana.

Wī, wā – He tohu tēnei (ki konei) mō te taha mauī me te taha matau. Ko te ira wahine, ko te ira tāne hoki pea tēnei.

Kei roto tonu ēnei huāngā i a tātou katoa, waihoki i tō tātou ao. Nō reira, ko te kaupapa o tēnei waiata ko te tūhono atu, ko te whakamihī, ko te whakanui i a tātou anō me tā tātou noho ki te ao.

<https://www.youtube.com/watch?v=GuDSFJhcGHE&feature=youtu.be>





E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

Waiho i te toipoto, kaua i te toiroa

Hei Waiata

Hei tāpiringa anō:

Ka hiahia pea ō ākonga kia mahi ā-rōpū ki te mahi i tētahi whakaaturanga mō te whakataukī. Whakamātauria ngā whakaaro rerekē kua puta i a rātou tae atu ki tēnei wā, ā, me whiriwhiri tētahi momo whakaaturanga hei whakaatu atu i a rātou mahi.

Me tāpiri atu hoki tētahi wāhanga B hei kīnaki i te mahi. Me rerekē tēnei mahi i te wāhanga A. Me whakakotahi ngā mahi katoa, arā, ko te whakataukī, ko ngā rerenga tāruarua, ko ngā mahi ā-ringa, ko ngā ngū, ā, me āta whakaaro hoki mō te tīmatanga me te mutunga o te whakaaturanga.

He ngohe whakamahana:

E noho i te porowhita, whakatauirahia te whakahuatanga o ngā oro o tō ingoa mā te pakipaki o ngā ringaringa, hei tauira; Ma-tu-a Ro-ngo-mai. Ka tāruaruatia ū whakahuatanga e te rōpū. Ka huri haere i te rōpū, ka whakahuatia e ia ākonga ngā oro o tōna anō ingoa mā te pakipaki. Ka whai haere anō te rōpū i a rātou. Whakatauirahia ētahi atu momo pānga ā-tinana i te huringa tuarua (arā, ko te papaki ā-tinana, ko te pakē matimati, ko te pakiwae, ko te takahi).

He ngohe:

Tautohua ngā oro, ā, tuhia ngā kupu matua: waiho, toipoto, kaua, toiroa. E hia ngā pakipaki mā ia kupu? Kia kotahi noa pea te nui o aku paki mō ngā kupu pērā i te wai, i te toi me te kau – ehara ēnei i te putanga oro rua – heoi, i tēnei wāhanga ka hoatu au kia 3 ngā paki mō te kupu toiroa, kia rite te roa ki te kupu toipoto, ko te hua, ko tētahi manawataki e pēnei ana te whakatakoto 2-3-2-3. Māu e whai te tauira e pai ana ki a koe. Mahia anō engari kaua e whakahua ngā kupu – papaki anahe.

Tēnā, me huri tētahi o ngā kupu hei ngū (arā, me whakatakoto tētahi mea ki runga ake i te kupu, me tā o raro rānei), ā, me whakahua anō te tauira paki. Me waihanga pea ngā ākonga tētahi mahi ā-tinana hei whakaatu i ngā ngū (he pai ki ngā tamariki o taku kura te mahi i te 'tā'). Me whiriwhiri ētahi atu kupu, me tango hoki ngā kupu, arā, kia kotahi anake te kupu, kia toru ngā ngū (arā, ngā wā whakatā). He pai te tāpiri atu i ngā ngū hei waihanga i ngā rerenga tāruarua, hei whakanikniko pea i ētahi atu o ā tātou mahinga puoro i tēnei rā. .

Whakamuramurahia ngā kupu waiho, kaua, toiroa, ā, whakawehhea ngā tamariki ki ngā rōpū e rua. Kei tētahi rōpū ngā kupu waiho/kaua, ā, kei te rōpū tuarua ngā kupu toipoto/toiroa. Mā ia rōpū ā rātou momo papaki ā-tinana (mā te pakē matimati, te pakipaki, te pakiwae, te takahi hoki rānei) e whiriwhiri hei whakaatu i ā rātou kupu. Whakaatuhia ngā mahi mā te kupu, mā te papaki anahe hoki.

Mā ngā ākonga tonu ā rātou taonga papā oro māori e whiriwhiri hei whakatangitangi i ā rātou tauira puoro. He pai te pahū, te wekuweku, te rarā, waihoki ko ngā rawa māori noa pērā i ngā kōhatu, i ngā anga, i ngā kōrari, i ētahi atu momo rākau rānei pērā i te tāwhao whao. Whakaatuhia mā te kupu, mā te kore kupu rānei, ā, me tango hoki rānei ētahi o ngā kupu, kia wahangū kē ētahi wāhi.

Ka taea hoki te whakawhiti atu i te mahi nei ki ngā taonga papā oro tōtika pērā i ngā momo pakakau, i te papakau rino rānei. Me tango atu ētahi o ngā orotau (i te nuinga o te wā ko te F me te B) kia mahia mai te oro rima. Nā te whāiti o ngā orotau i tēnei āwhata ka pai noa te whakatangitangi atu i ngā orotau rerekē i te wā kotahi, arā, ehara i te mea ka tiororo ngā orotau rerekē. Me whakamātautau noa ngā tamariki ngā rārangī orotau e pai ana ki a rātou.



E āwhina ana i ngā kaiako kia mahitahi ki ngā tamariki i tō rātou hokinga atu ki te kura i muri atu i tētahi aitua nui, i te pānga atu o tētahi taumahatanga nui rānei ki tō rātou ao

Hā Ora: Te Ahi Kātoro
Tau 2–5 (Taumata 1–2)

Waiho i te toipoto, kaua i te toiroa

Hei kanikani

Kia nui ngā momo puoro,
kia rerekē hoki te tere me te
wairua o te puoro hei akiaki i
ngā ākonga kia whakaputa i
ngā āhuatanga rerekē.

Mahia tētahi tūmahi/wāhangā rānei o te mahi, kātahi ka whakawetohia te puoro kia whakatā ngā ākonga. Me whakatangi pea tētahi puoro rerekē i ia wāhangā o te mahi.

Me aro atu ki ō ākonga, ki ā rātou mahi hoki kia taea ai e koe te whakatau i a rātou i ngā wā e tika ana. Me whakaweto te puoro, me whakapoto rānei tētahi o ngā tūmahi, me āta whakatenatena hoki i a rātou mā ngā kupu whakamihī.

Hei matapaki:

I te wā o te noho kāinga, i aha koutou ko tō whānau i a koutou e noho tahi ana ki tō poiham? He aha ā koutou mahi i waho atu o tō poiham?

He ngohe:

Whakatangihia tētahi puoro. Ka neke haere ngā tamariki e whakaari atu ana i tētahi mahi i mahia ai e rātou i roto i tō rātou poiham (hei tauira, ko te kai tahi, ko te tunu kai, ko te tākaro, ko te aha atu rānei). Ko te toipoto tēnei.

Me tini te waiata. Ināianei, ka neke haere ngā tamariki e whakaari atu ana i tētahi mahi i mahia ai e rātou ki waho atu o tō rātou poiham, hei tauira, ko te whakakorikori i te kurī, ko te kimi tēti pea, ko te eke paihikara. Ko te toiroa tēnei.

Whakaweheia te rūma ki ngā wāhangā e rua. Ko te toipoto tētahi wāhangā, ko te toiroa tērā atu. Kia nui ake te rahi o te wāhangā o toipoto.

Ko te ture o tēnei ngohe, ka tīmata mai te puoro me neke haere koe tae noa ki te wā ka whakawetohia te puoro (me āta tirotiro te kaiako kia kite mēnā e ngoikore haere ana ngā ākonga). Me whakaweto te puoro i waenganui i ngā tūmahi nei:

Me neke haere i roto i te rūma, i waenga hoki i ngā wāhi e rua. Me whai te tikanga o ia wāhi, arā, mahia ngā mahi i mahia ai i roto i te poiham ki roto i te rohenga o te toipoto, mahia ngā mahi o waho i te poiham ki te rohenga o te toiroa.

Ināianei, ka tae atu koe ki te wāhangā o te toipoto, me tūhono atu ki ētahi atu i roto i taua wāhi (me mahi takirua, takitoru rānei) ā, mahia tētahi o ō mahi, me whai rānei i tētahi o āna mahi. Me whai tētahi i tētahi, waihoki, me tū ia kaitākaro hei kaiārahi hoki, ā tae noa ki te wā ka hiahia koe kia puta atu ki te toiroa, ki reira mahi ai ō ake mahi ā-tinana, ō ake nekehanga hoki.

Ka hoki atu anō koe ki te rohe o te toipoto, me tūhono atu anō ki tētahi kaitākaro, ki tētahi tokorua rānei. Ka tū ia kaitākaro hei kaiārahi, ka whai haere rānei koe i ā rātou mahi, arā, ka tāpirihia ō ake mahinga ā-tinana ki a rātou hei kīnaki i ā rātou mahi. Hei tauira, mēnā kei te horoi rīhi tētahi kaitākaro, ka kīnakiāna mahi ki te mahi tāora rīhi. Rapua ētahi tūmahi ngahau hei kīnaki i te mahi a tō hoa.

Ka puta atu koe ki te rohe o te toiroa, tērā pea, ka hiahia koe ki te whakanui i tō putanga atu mā ō mahinga ā-tinana.

Whakakapia ngā tūmahi mā te puoro mārire, ā, ka heke haere ngā tamariki ki te papa i te mutunga. Me mau ringaringa rānei te katoa i te porowhitia, ā, ka hoki whakamuri kia 'pakō' ai te poiham!